



SEPTIEME LETTRE,
ESCRITTE A VN PROVINCIAL
PAR VN DE SES AMIS.

De Paris ce 27. Avril 1636.

MONSIEVR,

Après auoir appaisé le bon Pere, dont j'auois vn peu troublé le discours par l'histoire de Iean d'Alba; il le reprit sur l'assurance que ie luy donnay de ne luy en plus faire de semblables, & il me parla des maximes de ses Casuistes touchant les Gentilhommes, à peu prez en ces termes.

Vous sçauiez, me dit-il, que la passion dominante des personnes de c'ette condition, est epoint d'honneur, qui les engage à toute heure à des violences qui paroissent bien contraires à la pieté chrestienne, de sorte qu'il faudroit les exclure presque tous de nos confessionnaux, si nos Peres n'eussent vn peu relasché de la seuerité de la religion, pour s'accommoder à la foiblesse des hommes. Mais comme ils vouloient demeurer attrachez à l'Euangile par leur deuoir enuers Dieu, & aux gens du monde par leur charité pour le prochain, ils ont eü besoin de toute leur lumiere, pour trouuer des expediens, qui temperassent les choses auec tant de iustesse, qu'on püst maintenir & reparer son honneur par les moiens, dont on se sert ordinairement dans le monde, sans blesser neantmoins sa conscience; afin de conseruer tout ensemble deux choses aussi opposées en apparence, que la pieté, & l'honneur.

Mais autant que ce dessein estoit vtile, autant l'exécution en estoit penible. Car ie croy que vous voyez assez la grandeur & la difficulté de c'ette entreprise. Elle m'estonne, luy dis-je. Elle vous estonne, me dit-il? Le le croy. Elle en estonneroit bien d'autres. Ignorez vous que d'vne part la loy del'Euangile ordonne *de ne point rendre le mal pour le mal, & d'en laisser la vengeance à Dieu*? Et que de l'autre les loix du monde defendent de souffrir les injures, sans en tirer raison soy mesme, & souuent par la mort de ses ennemis? Auez vous jamais rien veü qui paroisse plus contraire? Et cependant quand ie vous dis, que nos Peres ont accordé ces choses, vous me dites simplement, que cela vous estonne. Je ne m'expliquois pas assez mon Pere. Je tiendrois la chose impossible, si après ce que i'ay veü de vos Peres, ie ne sçauois qu'ils peuent faire facilement, ce qui est impossible aux autres homes. C'est ce qui me fait eroire qu'ils en ont bien trouué quelque moien, que j'admire sans le cōnoistre, & que ie vous prie de me declarer.

Puisque vous le prenez ainsi, me dit-il, ie ne puis vous le refuser. Sçachez donc que ce principe merueilleux, est nostre grãde methode *de diriger l'intention*; dont l'importance est telle dans nostre morale, que j'oserois quasi la comparer à la doctrine de la probabilité. Vous en auez veü quelques traits en passant dans de certaines maximes que ie vous ay dites. Car lors que ie vous ay fait entendre, comment les valets peuent faire en conscience de certains messages facheux, n'auz vous pas pris garde, que c'estoit seulement en détournant leur intention du mal, dont ils sont les entremetteurs, pour la porter au gain qui leur en reuient? Voila ce que c'est que *diriger l'intention*. Et vous auez veü de mesme, que ceux qui donnent del'argent pour des benefices, seroient de veritables simonia-

A

ques, sans vne pareille diuersion. Mais ie veux maintenant vous faire voir cette grande methode dans tout son lustre, sur le sujet de l'homicide, qu'elle iustifie en mille rencontres, afin que vous iugiez par vn tel effet, tout ce qu'elle est capable de produire. le voy déjà, luy dis-je, que par là tout sera permis, rien n'en eschaperà. Vous allez roûjours d'une extremité à l'autre, répondit le Pere; corrigez vous de cela. Car pour vous tesmoigner, que nous ne permettons pas tout, sçachez que, par exemple, nous ne souffrons iamais d'auoir l'intention formelle de pecher, pour le seul dessein de pecher; & que quiconque s'obstine à borner son desir dans le mal pour le mal mesme, nous rompons avec luy; cela est diabolique: voila qui est sans exception d'âge, de sexe, de qualité. Mais quand on n'est pas dans cette malheureuse disposition, alors nous essayons de mettre en pratique nostre methode de *diriger l'intention*, qui consiste à se proposer pour fin de ses actions vn objet permis. Ce n'est pas qu'autant qu'il est en nostre pouuoir, nous ne détournions les hommes des choses defenduës; mais quand nous ne pouons pas empêcher l'action, nous purifions au moins l'intention; & ainsi nous corrigeons le vice du moien, par la pureté de la fin.

Voila par où nos Peres ont trouué moien de permettre les violences qu'on pratique en defendant son honneur. Car il n'y a qu'à détourner son intention du desir de vengeance qui est criminel, pour la porter au desir de defendre son honneur, qui est permis selon nos Peres. Et c'est ainsi qu'ils accomplissent tous leurs devoirs enuers Dieu & enuers les hommes. Car ils contentent le monde, en permettant les actions; & ils satisfont à l'Euangile, en purifiant les intentions. Voila ce que les anciens n'ont point connu; voila ce qu'on doit à nos Peres. Le comprenez vous maintenant? Fort bien, luy dis-je. Vous accordez aux hommes la substance grossiere des choses, & vous donnez à Dieu ce mouuement spirituel de l'intention; & par cet equitable partage, vous aliez les loix humaines avec les diuines. Mais, mon Pere, pour vous dire la verité, ie me défie vn peu de vos promesses, & ie doute que vos auteurs en disent autant que vous. Vous me faites tort, dit le Pere; ie n'auance rien que ie ne prouue; & par tant de passages, que leur nombre, leur autorité, & leurs raisons, vous remplissent d'admiration.

Car pour vous faire voir l'alliance que nos Peres ont faite des maximes de l'Euangile, avec celles du monde, par cette direction d'intention, escoutez nostre Pere Reginaldus in praxi. l. 21. n. 62. p. 260. *Il est defendu aux particuliers de se venger. Car S. Paul dit aux Rom. 12. Ne rendez à personne le mal pour le mal: & l'Eccl. 28. Celuy qui veut se vanger attirera sur soy la vengeance de Dieu, & ses pechiez ne seront point oubliés. Outre tous ce qui est dit dans l'Euangile du pardon des offenses, comme dans les chapitres 6. & 18. de S. Matthieu. Certes, mon Pere, si apres cela il dit autre chose, que ce qui est dans l'Escripture, ce ne sera pas manqué de la sçauoir. Que conclut-il donc enfin? Le voicy, dit-il. De toutes ces choses il paroist, qu'un homme de guerre peut sur l'heure mesme poursuivre celuy qui l'a blessé; non pas à la verité avec l'intention de rendre le mal pour le mal, mais avec celle de conseruer son bonneur; Non vt malum pro malo reddat, sed vt conseruet bonorem.*

Voyez-vous comment ils ont soin de defendre d'auoir l'intention de rendre le mal pour le mal, parce que l'Escripture le condamne? Ils ne l'ont iamais souffert; Voyez Lessius. De iust. l. 2. c. 9. d. 12. n. 79. *Celuy qui a receu vn soufflet, ne peut pas auoir l'intention de s'en vanger; mais il peut bien auoir celle d'en uier l'insamie, & pour cela de repousser à l'instant cette injure, & mesme à coups d'espee, etiam cum gladio.* Nous sommes si éloignés de souffrir qu'on ait le dessein de se

venger de ses ennemis, que nos Peres ne veulent pas seulement, qu'on leur sou-
haitte la mort par vn mouuement de haine. Voyez nostre Pere Escobar tr. 5. Ex 5.
n. 145. *Si vostre ennemy est disposé à vous nuire, vous ne devez pas souhaitter sa mort
par vn mouuement de haine, mais vous le pouuez bien faire pour cuiten vostre dom-
mage.* Car cela est tellement legitime avec cette intention, que nostre grand
Hurtado de Mendoza dit: *Qu'on peut prier Dieu de faire promptement mourir
ceux qui se disposent à nous persecuter, si on ne le peut cuiten autrement.* C'est au
l. de spe. vol. 2. di. 15. 3. sect. 4. §. 48.

Mon Reuerend Pere, luy dis-je, l'Eglise a bien oublié de mettre vne oraison
à cette intention dans ses prieres. On n'y a pas mis, me dit-il, tout ce qu'on peut
demander à Dieu. Outre que cela ne se pouuoit pas; car cette opinion-là est plus
nouuelle que le Breuiaire: Vous n'estes pas bon chronologiste. Mais sans sortir
de ce sujet, escoutez encore ce passage de nostre Pere Gaspar Hurtado, de sub-
pecc. diff. 9. cité par Diana p. 5. tr. 14. R. 99. C'est l'un des 24. Peres d'Escobar.
*Vn beneficier peut sans aucun peché mortel desirer la mort de celuy qui a vne pen-
sion sur son benefice; & vn fils celle de son pere, & se rejouir quand elle arriue,
pourueu que ce ne soit que pour le bien qui luy en reuiet, & non pas par vne hai-
ne personnelle.*

O mon Pere, luy dis-je, voila vn beau fruit de la direction d'intention! le
voy bien qu'elle est de grande estenduë. Mais neanmoins il y a de certains cas,
dont la resolution seroit encore difficile, quoy que fort necessaire, pour les gen-
tilshommes. Proposez les pour voir, dit le Pere. Montrez-moy, luy dis-je, avec
toute cette direction d'intention, qu'il soit permis de se battre en duel. Nostre
grand Hurtado de Mendoza, dit le Pere, vous y satisfera sur l'heure, dans ce
passage que Diana rapporte p. 5. tr. 14. R. 99. Si vn gentilhomme qui est appel-
lé en duel, est connu pour n'estre pas deuot, & que les pechez qu'on luy voit
commettre à toute heure sans scrupule, fassent aisément iuger, que s'il refuse
le duel, ce n'est pas par la crainte de Dieu, mais par timidité; & qu'ainsi on di-
se de luy que c'est vne poule, & non pas vn homme, *galina & non vir*; il peut
pour conseruer son honneur, se trouuer au lieu assigné, non pas veritablement
avec l'intention expresse de se battre en duel, mais seulement avec celle de se
deffendre, si celuy qui l'a appellé, l'y vient attaquer injustement. Et son action
fera toute indifferente d'elle-mesme. Car quel mal y a-t-il d'aller dans vn
champ, de s'y promener en attendant vn homme, & de se deffendre si on l'y
vient attaquer. Et ainsi il ne peche en aucune maniere, puisque ce n'est point
du tout accepter vn duel, ayant l'intention dirigée à d'autres circonstances.
Car l'acceptation du duel consiste en l'intention expresse de se battre, laquelle
celuy-cy n'a pas.]

Vous ne m'avez pas tenu parole, mon Pere. Ce n'est pas là proprement per-
mettre le duel. Au contraire il éuite de dire que c'en soit vn, pour rendre la cho-
se permise; tant il la croit defenduë. Ho, ho, dit le Pere, vous commencez à
peuetter, j'en suis ravi. Je pourrois dire neanmoins qu'il permet en cela
tout ce que demandent ceux qui se battent en duel. Mais puis qu'il faut vous re-
pondre iuste, nostre Pere Layman le fera pour moy, en permettant le duel en
mots propres, pourueu qu'on dirige son intention à l'accepter seulement pour
conseruer son honneur, ou sa fortune. C'est au l. 3. p. 3. c. 3. n. 2. & 3. *Si vn soldat
à l'armée, ou vn gentilhomme à la Cour, se trouue en estat de perdre son honneur, ou
sa fortune s'il n'accepte vn duel, ie ne voy pas que bon puisse condamner celuy qui le
reçoit pour se deffendre.* Petrus Hurtado dit la mesme chose au rapport de nostre

celebre Escobar au tr. i. ex. 7. n. 96. & au n. 98. il adjoute ces paroles de Hurta-
do: *Qu'on peut se battre en duel pour defendre mesme son bien, s'il n'y a que ce moyen
de le conserver, parce que chacun a le droit de defendre son bien, & mesme par la
mort de ses ennemis.* l'admitay sur ces passages de voir que la pieté du Roy employe
sa puissance à defendre & à abolir le duel dans ses Estats; & que la pieté des
Iesuites occupe leur subtilité à le permettre & à l'autoriser dans l'Eglise. Mais
le bon Pere estoit si en train, qu'on luy eust fait tort de l'arrester, de sorte qu'il
poursuiuit ainsi. Enfin, dit-il, Sanchez, voyez vn peu quels gens ie vous cite, fait
plus. Car il permet non seulement de receuoir, mais encore d'offrir le duel, en
dirigeant bieſon intention. Et nostre Escobar le suit en cela au mesme lieu n. 97.
Mon Pere, luy dis-je, ie le quitte si cela est; mais ie ne ctoiray iamais qu'il l'air es-
crit, si ie ne le voy. Liscez-le donc vous mesme, me dit-il; & ie leus en effet ces
„ mots dans la Theologie mor. de Sanchez, l. 2. c. 39. n. 7. Il est bien raisonnable
„ de dire, qu'un homme peut se battre en duel pour sauuer sa vie, son honneur,
„ ou son bien en vne quaniſité considerable, lors qu'il est constant qu'on les luy
„ veut rauer iniustement, par des proceſ & des chicaneries, & qu'il n'y a que ce
„ seul moyen de les conſeſtuer. Et Nauarrus dit fort bien, qu'en cette occasion il
„ est permis d'accepter, & d'offrir le duel; *licet acceptare, & offerre duellum.* Et
„ auſſi qu'on peut tuer en cachette ſon ennemy: Et mesme oe ces rencontres-
„ là on ne doit point vſer de la voye du duel, ſi on peut tuer en cachette ſon hom-
„ me, & ſortir par là d'affaire. Car par ce moyen on éuitera tour enſemble, &
„ d'expoſer ſa vie dans vn combat, & de participer au peché que nostre ennemy
„ commettrait par vn duel.]

Voilà, mon Pere, luy diſ-je, vn pieux guet apend: mais quoy que pieux, il
demeure touſſours guet apend, puis qu'il est permis de tuer ſon ennemy en trahiſon.
Vous ay-je dit, repliqua le Pere, qu'on peut tuer en trahiſon; Dieu m'en gar-
de. Ie vous diſ qu'on peut tuer en cachette; & de là vous concluez, qu'on peut
tuer en trahiſon, comme ſi c'estoit la mesme choſe. Apprenez d'Escobar, tr. 6. Exa.
4. n. 26. ce que c'est que tuer en trahiſon, & puis vous parlerez. *On appelle tuer en
trahiſon, quand on tue celuy qui ne s'en deſſe en aucune maniere. Et c'est pourquoy celuy
qui tue ſon ennemy n'est pas dit le tuer en trahiſon, quoy que ce ſoit par derriere, ou dans vne
embuſche; licet per inſidias, aut à tergo percutiat.* Et au mesme traité. n. 56. *Celuy qui
tue ſon ennemy avec lequel il s'estoit reconcilié ſous promeſſe de ne plus attendre à ſa vie, n'est
pas abſolument dit le tuer en trahiſon, à moins qu'il y euſt entr'eux vne amitié bien eſtroite,
arctior amicitia.*

Vous voyez par là, que vous ne ſçavez pas ſeulement ce que les termes ſignifient;
& cependant vous parlez comme vn Docteur. l'auoué, luy diſ-je, que cela m'est
nouveau; & j'apprens de cette definition, qu'on n'a peut eſtre iamais tué perſon-
ne en trahiſon. Car on ne s'auiſe guere d'aſſaſſiner que ſes ennemis. Mais quoy
qu'il en ſoit, on peut ſelon Sanchez tuer hardiment, ie ne diſ plus en trahiſon,
mais ſeulement par derriere, ou dans vne embuſche, vn calomnieux qui nous
poursuie en iuſtice; Oüy, dit le Pere, mais en dirigeant bien l'intention; vous
oubliez touſſours le principal. Et c'est ce que Molina ſoutient auſſi to. 4. tr. 3. diſp.
12. Et mesme, ſelon nostre docteur Reginaldus l. 21. c. 5. n. 57. *On peut tuer auſſi les
faux teſmoins qu'il ſuſcite contre nous.* Et enſin ſelon nos grands & celebres Peres
Tannerus, & Emmanuel Sa; on peut de mesme tuer & les faux-teſmoins, & le lu-
ge, s'il eſt de leur intelligence. Voicy ſes mots tr. 3. diſp. 4. q. 8. n. 83. *Sors, dir-il,
& Leſſus diſent qu'il n'est pas permis de tuer les faux teſmoins, & le luge, qui conſpirent à
faire mourir vn innocent; mais Emmanuel Sa. & d'autres auſſent, ens raiſon d'impronner*

et sentiment là, au moins pour ce qui touche la conscience. Et il confirme encore au mesme lieu qu'on peut tuer & tesmoins & iuge.

Mon Pere, luy dis-je, j'entens maintenant assez bien vostre principe de la direction d'intention; mais j'en veux bien entendre aussi les consequences, & tous les cas où cette methode donne le pouuoir de tuer. Reprenons donc ceux que vous m'avez dits, de peur de méprise. Car l'equiuoque seroit icy dangereuse. Il ne faut tuer que bien à propos, & sur bonne opinion probable. Vous m'avez donc assuré qu'en dirigeant bien son intention, on peut selon vos Peres, pour conseruer son honneur & mesme son bien, accepter vn duel, l'offrir quelquefois, tuer en cachette vn faux accusateur, & ses tesmoins avec luy, & encore le iuge corrompu qui les fauorise; Et vous m'avez dir aussi, que celuy qui a receu vn soufflet, peut sans se venger le reparer à coups d'espée. Mais mon Pere, vous ne m'avez pas dit avec quelle mesure. On ne s'y peut guere trôper, dit le Pere, car on peut aller iusqu'à le tuer. C'est ce que prouue fort bien nostre sçauant Henriquez l. 14. c. 10. n. 3. & d'autres de nos Peres rapportez par Escobar au tr. 1. Ex. 7. n. 48. en ces mots. On peut tuer celuy qui a donné vn soufflet, quoy qu'il s'enfuye, pour- ueu qu'on eoit de le faire par haine ou par vengeance, & que par là, on ne donne pas lieu à des meurtres excessifs & nuisibles à l'Estat. Et la raison en est qu'on peut ainsi courir apres son honneur, comme apres du bien dérobé. Car encore que vostre honneur ne soit pas entre les mains de vostre ennemi comme le- roient des hardes qu'il vous auroit volées; on peut neantmoins le recouurer en la mesme maniere, en donnant des marques de grandeur & d'aurorité, & s'acquerrant par là l'estime des hommes. Et en effet n'est-il pas veritable que celuy qui a receu vn soufflet, est reputé sans honneur, iusques à ce qu'il ait rû son ennemi.] Cela me parut si horrible que j'eus peine à me retenir; Mais pour sçauoir le reste ie le laissay continuer ainsi. Et mesme, dit-il, on peut pour preuenir vn soufflet tuer celuy qui le veut donner, s'il n'y a que ce moien de l'éuiter. Cela eommun dans nos Peres. Par exemple Azor inst. mor. part. 3. p. 119. (C'est encore l'un des 24. V.) Est-il permis à vn homme d'honneur, de tuer celuy qui luy veut donner vn soufflet, ou vn coup de baston? Les vns disent que non; & leur raison est que la vie du prochain, est plus precieuse que nostre honneur; outre qu'il y a de la ctuauté à tuer vn homme, pour éuiter seulement vn soufflet. Mais les autres disent que cela est permis; & certainement ie le trouue probable, quand on ne peut l'éuiter autrement. Car sans cela l'honneur des innocens seroit sans cesse exposé à la malice des insolens.] Nostre grand Filiarius de mesme to. 2. tr. 29. c. 3. n. 50. & le P. Hereau dans ses Ecrits de l'homicide, Hurtado de Mendoza in 2. 2. disp. 170. sect. 16. § 137. Et Becan somm. t. 1. q. 64. de homicid. Et nos Peres Flahaut, & le Court, dans leurs Ecrits que l'Vniuersité dans sa 3. Requête arapportez tout au long pour les décrier, mais elle n'y a pas réussi, & Escobar au mesme lieu n. 48. disent tous les mesmes choses. Enfin cela est si generalement soutenu que Lessius l. 2. c. 9. d. 12. n. 77. en parle comme d'une chose autorisée par le consentement vniuersel de tous les Casuistes. Il est permis, dit-il, selon le consentement de tous les Casuistes, ex sententiâ omnium, de tuer celuy qui veut donner vn soufflet ou vn coup de baston, quand on ne le peut euiser autrement. En voulez vous dauantage?

Ie l'en remerciay, car ie n'en auois que trop entendu. Mais pour voir jusqu'où iroit vne si damnable doctrine, ie luy dis: Mais mon Pere, ne sera-t'il point permis de tuer pour vn peu moins? Ne sçauoit-on diriger son intention, en sorte qu'on puisse tuer pour vn dementy? Ouy, dit le Pere, & selon nostre Pere Bal-

delle l. 3. disp. 24. n. 24. rapporté par Escobar au mesme lieu n. 49. *Il est permis de tuer celui qui vous dit: Vous auez menti, si on ne peut le reprimer autrement.* Et on peut tuer de la mesme sorte pour des médisances selon nos Peres. Car Lessius, que le Pere Heteau entr'autres suit mot à mot, dit au lieu déjà cité: Si vous taisez, chez de ruiner ma reputation par des calomnies deuant des personnes d'honneur, & que ie ne puisse l'euitier autrement qu'en vous tuant, le puis-je faire? Oüy, selon des Autheurs modernes, & mesme encore que le crime que vous publiez soit veritable, si toute fois il est secret, en forte que vous ne puissiez le decouurir selon les voyes de la justice. Et en volcy la preuue. Si vous me voulez rair l'honneur en me donnant vn soufflet, ie puis l'empescher par la force des armes, donc la mesme defense est permise, quand vous me voulez faire la mesme injure avec la langue. De plus on peut empescher les affronts, donc on peut empescher les médisances. Enfin l'honneur est plus cher que la vie. Or on peut tuer pour defendre sa vie; donc on peut tuer pour defendre son honneur.]

Voila des argumens en forme. Ce n'est pas là discourir; c'est prouuer. Et enfin ce grand Lessius monstre au mesme endroit n. 78. qu'on peut tuer mesme pour vn simple geste, ou vn signe de mespris. *On peut, dit-il, attaquer & oster l'honneur en plusieurs manieres dans lesquelles la defense paroist bien iuste; comme si on veut donner vn coup de baston, ou vn soufflet; ou si on veut nous faire affront par des paroles ou par des signes; siue per signa.*

O mon Pere, luy dis-je, voila tout ce qu'on peut souhaiter pour mettre l'honneur à couuert; mais la vie est bien exposée, si pour de simples médisances, & des gestes desobligeans, on peut tuer le monde en conscience. Cela est vray, me dit-il, mais comme nos Peres sont fort circonspectz, ils ont trouué à propos de defendre de mettre cette doctrine en vſage, en de certaines occasions, comme pour les simples médisances. Car ils disent au moins: *Qu'à peine doit-on la pratiquer, practice vix probari potest.* Et ce n'a pas esté sans raison; la voicy. Je la ſçay bien, luy dis-je; C'est parce que la loy de Dieu defend de tuer. Ils ne le prennent pas par là, me dit le Pere; Ils le trouuent permis en conscience, & en ne regardant que la verité en elle mesme. Et pourquoy le defendent-ils donc? Escoutez-le, dit-il; C'est parce qu'on dépeupleroit vn Estat en moins de tien, si on entuoit tous les médisans. Apprenez-le de nostre Reginaldus l. 21. n. 63. p. 260. *Encore que cette opinion, qu'on peut tuer pour vne médisance, ne soit pas sans probabilité dans la theorie, il faut suivre le contraire dans la pratique. Car il faut toujours eniter le dommage de l'Estat dans la maniere de se defendre. Or il est visible qu'en tuant le monde de cette sorte, il se feroit vn trop grand nombre de meurtres.* Lessius en parle de mesme au lieu déjà cité. *Il faut prendre garde que l'usage de cette maxime, ne soit nuisible à l'Estat. Car alors il ne faut pas le permettre: tunc enim non est permittendus.*

Quoy, mon Pere, ce n'est donc icy qu'une defense de politique, & non pas de religion? Peu de gens s'y arretteront, & sur tout dans la colere. Car il pourroit estre assez probable qu'on ne fait point de tort à l'Estat de le purger d'un meschant homme. Aussi, dit-il, nostre Pere Filiutius joint à cette raison là vne autre bien considerable tr. 29. c. 3. n. 51. *C'est qu'on seroit puni en justice en tuant le monde pour ce ſu; et.* Je vous le disois bien, mon Pere, que vous ne feriez iamais rien qui vaille, tant que vous n'aurez point les juges de vostre costé. Les juges, dit le Pere, qui ne penetrent pas dans les consciences, ne jugent que par le dehors de l'action; au lieu que nous regardons principalement à l'intention. Et de là vient que nos maximes sont quelque fois vn peu differentes des leurs. Quoy qu'il en soit, mon Pere, il se conclut fort bien des vôtres, qu'on peut tuer les médisans.

en feuteté de conscience, pourueu que ce soit en feuteté de sa personne.

Mais, mon Pere, apres auoir si bien pourueu à l'honneur, n'auez-vous tien fait pour le bien? le sçay qu'il est de moindre consideration; mais il n'importe. Il me semble qu'on peut bien diriger son intention à tuer pour le conseruer. Oüy, dit le Pere; Et ie vous en ay touché quelque chose qui vous a pû donner cette ouuerture. Tous nos casuistes s'y accordent; & mesme on le permet encore que l'on ne craigne pluen aucune violence de ceux qui nous ofent nostre bien, comme quand ils l'enfuient. Azor de nostre Societé le prouue p. 3. l. 2. c. 1. q. 20.

Mais, mon Pere, combien faut-il que la chose vaille pour nous porter à cette extremité? Il faut, selon Reginaldus l. 11. c. 5. n. 66. & Tannerus in 2. 2. disp. 4. q. 8. d. 4. n. 69. que la chose soit de grand prix au jugement d'un homme prudent. Et Layman, & Filiutius en parlent de mesme. Ce n'est rien dire, mon Pere, où ita-t'on chercher vn homme prudent, dont la rencontre est si rare, pour faire cette estimation? Que ne determinent-ils exactement la somme? Comment, dit le Pere; estoit-il si facile à vostre auis, de compater la vie d'un homme & d'un Chrestien à de l'argent? C'est icy où ie veux vous faire sentir la necessité de nos Casuistes. Cherchez moy dans tous les anciens Peres pour combien d'argent il est permis de tuer vn homme. Que vous diront-ils sinon *Non occides; vous ne tuerez point?* Et qui a donc ozé determiner cette somme, repondif-je? C'est, me dit-il, nostre grand & incomparable Molina, la gloire de nostre Societé, qui par sa prudence inimitable, l'a estimée à 6. ou 7. ducats, pour lesquels il assure qu'il est permis de tuer, encore que celui qui les emporte s'enfuye. C'est en son t. 4. tt. 3. disp. 16. d. 6. Et il dit de plus au mesme endroit: *Qu'il n'oferoit condamner d'aucun peché vn homme qui tue celui qui luy veut oster vne chose de la valeur d'un escu, ou moins; vnus aurei, vel minoris ad huc valoris.* Ce qui a porté Escobar à establir cette regle generale n. 44. que regulierement on peut tuer vn homme pour la valeur d'un escu selon Molina.

O mon Pere, d'où Molina a-t'il pû estre éclairé pour déterminer vne chose de cette importance sans aucun secours de l'Escripture, des Conciles, ny des Peres! Je voy bien qu'il a eü des lumieres bien particulieres, & bien esloignées de S. Augustin, sur l'homicide, aussi bien que sur la grace. Me voicy bien sçauant sur ce chapitre; & ie connois parfaitement qu'il n'y a plus que les gens d'Eglise qu'on puisse offenser & pour l'honneur, & pour le bien, sans craindre qu'ils tiuent ceux qui les offensent. Que voulez-vous dire, repliqua le Pere? Cela seroit-il raisonnable à vostre auis, que ceux qu'on doit le plus respecer dans le monde, fussent seuls exposez à l'insolence des méchans? Nos Peres ont preuenu ce desordre. Car Tannerus to. 2. d. 4. q. 8. d. 4. n. 76. dit. *Qu'il est permis aux Ecclesiastiques, & aux Religieux mesmes, de tuer pour défendre non seulement leur vie, mais aussi leur bien, ou celui de leur Communauté.* Molina qu'Escobar rapporte n. 43. Becan in 2. 2. t. 2. q. 7. de hom. concl. 2. n. 5. Reginaldus l. 11. c. 5. n. 68. Layman l. 3. tt. 3. p. 3. c. 3. n. 4. Lefsius l. 2. c. 9. d. 11. n. 72. & les autres, se seruent tous des mesmes paroles.

Et mesme selon nostre celebre P. l'Amy, il est permis aux Prestres & aux Religieux de preuenir ceux qui les veulent noircir par des médisances, en les tuant pour les en empescher. Mais c'est touïours en dirigeant bien l'intention. Voicy ses termes t. 5. disp. 36. n. 118. Il est permis à vn Ecclesiastique, ou à vn Religieux de tuer vn calomniateur, qui menace de publier des crimes scandaleux de sa Communauté, ou de luy mesme, quand il n'y a que ce seul moien de l'en empêcher, comme s'il est prest à respendre ses médisances, si on ne le tue promptement. Car en ce cas, comme il seroit permis à ce Religieux de tuer celui

„qui luy voudroit oster la vie; il luy est permis aussi de tuer celuy, qui luy veut
 „oster l'honneur, ou celuy de sa Communauté de la mesme sorte qu'aux gens
 „du monde.] Je ne sçauois pas cela, luy dis-je, & j'auois crû simplement le con-
 traire sans y faire de reflexion, sur ce que j'auois oüy dire, que l'Eglise abhorre
 tellement le sang, qu'elle ne permet pas seulement aux juges Ecclesiastiques d'as-
 sister aux iugemens criminels. Ne vous arrestez pas à cela, dit-il; nostre Pere
 l'Amy prouue fort bien cette doctrine, quoy que par vn trait d'humilité bien
 feanrà ce grand homme, il la soumette aux lecteurs prudents. Et Caramoüel
 nostre illustre defenseur qui la rapporte dans sa theologie fondamentale p. 543. la
 croit si certaine qu'il soutient *que le contraire n'est pas probable* : & il en tire des
 conclusions admirables comme celle-cy qu'il appelle. *la conclusion des conclusions,*
conclusionum conclusio : *Qu'un Prestre non seulement pent en de certaines rencontres*
tuer vn calomnieux, mais encore qu'il y en a, où il le doit faire: Etiam aliquando de-
bet occidere. Il examine plusieurs questions nouuelles sur ce principe; par exemple
 celle-cy: SçA VOIR SI LES IESUITES PEUVENT TUEE LES JANSENISTES? Voila,
 mon Pere m'ecriay-je, vn point de Theologie bien surprenant! Et ie tiens les
 Jansenistes déjà morts par la doctrine du P. l'Amy. Vous voila attrapé, dit le Pere.
 Il conclut le contraire des mesmes principes. Et comment cela, mon Pere? Parce-
 me dit-il, qu'ils ne nuisent pas à nostre reputation. Voicy les mots n. 1146. & 1147.
 p. 547. & 548. *Les Jansenistes appellent les Iesuites Pelagiens: pourra-t-on les tuer*
pour cela? Non; d'autant que les Jansenistes n'obscurissent non plus l'eclat de la So-
cieté, qu'un bizonceluy du soleil; au contraire ils l'ont releué, quoy que contre leur
intention. Occidi non possunt, quia nocere non potuerunt.

Hé quoy, mon Pere, la vie des Jansenistes dépend donc seulement de sçauoir
 s'ils nuisent à vostre reputation? Le les tiens peu en seureté, si cela est. Car s'il de-
 uient tant soit peu probable, qu'ils vous fassent tort, les voila tuables sans diffi-
 culté. Vous en ferez vn argument en forme; & il n'en faut pas dauantage avec
 vne direction d'intention, pour expedier vn homme en seureté de conscience.
 O qu'heureux sont les gens qui ne veulent pas souffrir les injures, d'estre instruits
 en cette doctrine! Mais que malheureux sont ceux qui les offensent! En verité,
 Mon Pere, il vaudroit aurant auoir affaire à des gens qui n'ont point de religion,
 qu'à ceux qui en sont instruits jusqu'à cette direction. Car enfin l'intention de ce-
 luy qui blesse ne soulage point celuy qui est blessé. Il ne s'apperoit point de ce-
 tre direction secrette, & il ne sent que celle du coup qu'on luy porte. Et ie ne sçay
 mesme si on n'auroit pas moins de dépit de se voir tuer brutalement par des gens
 emportez, que de se sentir poignarder consciencieusement par des gens denors.

Tout de bon, mon Pere, ie suis vn peu surpris de tout cecy, & ces questions
 du P. l'Amy & de Caramoüel ne me plaisent point. Pourquoi, dit le Pere; estes-
 vous Janseniste? I'en ay vne autre raison, luy dis-je. C'est que j'éctis de temps en
 temps à vn de mes amis de la campagne ce que j'apprens des maximes de vos
 Peres. Et quoy que ie ne fasse que rapporter simplement & citer fidèlement
 leurs paroles, ie ne sçay neantmoins s'il ne se pourroit pas rencontrer quelque
 esprit bizarre, qui s'imaginant que cela vous fait tort, n'en tirast de vos principes
 quelque méchante conclusion. Allez, me dit le Pere, il ne vous en arriuera point
 de mal; j'en suis garand. Sçachez que ce que nos Peres ont imprimé eux-mesmes
 & avec l'approbacion de nos Superieurs, n'est ny mauuais, ny dangereux à publier.

Ie vous ecris donc sur la parole de ce bon Pere; mais le papier me manque
 tousiours, & non pas les passages. Car il y en a tant d'autres & de si forts, qu'il
 faudroit des volumes pour tout dire. Je suis, &c.